

【如幻聞熏聞修金剛三昧】（科註第八三一頁倒數第六行）

《楞嚴經文句卷第六》：全性起修，修即無修，故云如幻。以本覺聞性，熏於始覺，以聞性中所起始覺，修於本覺，故云聞熏聞修。以其頓破無明結根，頓顯常住藏性，故云金剛三昧也。

《楞嚴經講義第十五卷》：如幻聞熏聞修，金剛三昧者。

如幻是喻，聞熏聞修是法，金剛三昧亦然。上聞字，指本覺聞性內熏，熏起始覺之智。下聞修，即始覺反聞修習，入流照性之功。此種修法，無修而修，修即無修，喻如幻事，從無而有，有即非有。修成而得三昧，名曰金剛三昧。修即入流照性，照破五陰，解除六結（佛陀以一寶花巾比喻真性，花巾繫六結，而以六結比喻眼、耳、鼻、舌、身、意等六根，表示根本雖一，然由妄相乃分別生起六根），返窮流根（生死欲流之根），至不生滅。徹法底源，無動無壞，究竟堅固，喻如金剛堅固不壞。三昧是梵語，此云正定。即首楞嚴大定。

【聞思修】（科註第八三一頁倒數第六行）

《楞嚴經正脈疏卷二十五》：此之三慧，惟聞慧不同常途，故思修亦別。約常途，聞即多聞，謂聞經解意功夫。其體即耳識，及耳家俱意識所發勝解分別。今此聞字，即指耳根中聞性，體即無分別如如智理而已。

思，即不著空有，一味反聞，外脫聲塵，內冥智理，且約

靜習在禪功夫也。

修，謂達于萬行，與此禪觀不相違背，所謂咳唾掉臂，無不定時。何況一切善行，此約初心修進便應具足。

《楞嚴經講義第十五卷》：此之三慧，不同常途。常途則以聞經解義為聞慧。其體即耳識，與耳家同時意識所發之勝解。思、修亦即獨頭意識，將所聞之聲教，思惟修習。此皆不離生滅識心，識心為圓通之障礙。

本經以捨識、用根為要旨，故三慧不同常途。今此聞慧，即從耳根聞性妙理，所起始覺妙智。不聞所聞之聲塵，但聞能聞之聞性。思慧，即正智觀察，能聞者是誰？不著空有二邊，一味反聞聞自性。修慧，即如幻聞熏聞修，念念旋元自歸，伏歸元真，發本明耀，解六結，越三空（我空、法空、俱空），破五陰，超五濁，全憑無分別智，反聞之功。